



KEMENTERIAN PEMBANGUNAN WANITA, KELUARGA DAN MASYARAKAT (KPWKM)

SIARAN MEDIA

Persidangan Pelindungan Kanak-Kanak dalam Dunia Siber:

Ke Arah Pendekatan Integrasi

PUTRAJAYA, 24 Mac 2015 – Perlindungan kanak-kanak dalam dunia siber adalah cabaran besar yang perlu ditangani oleh pihak berkuasa dari serata dunia. Sehubungan itu, Kementerian Pembangunan Wanita, Keluarga dan Masyarakat (KPWKM) telah menganjurkan persidangan *Regional Conference on Child Online Protection: Towards An Integrated Approach*. Persidangan ini bertujuan untuk memberi penjelasan tentang Internet dan bagaimana kanak-kanak dapat mengakses maklumat dengan selamat.

Persidangan ini telah dirasmikan oleh YB Dato' Sri Rohani Abul Karim, Menteri Pembangunan Wanita, Keluarga dan Masyarakat. Kementerian ini telah bekerjasama dengan Suruhanjaya Komunikasi dan Multimedia Malaysia (MCMC) dan UNICEF Malaysia untuk menganjurkan persidangan *Child Online Protection*. Kolaborasi ini telah mengadakan beberapa program seperti bengkel *Child Online Protection Preparatory* dari 7 hingga 14 Mac 2015 di Wisma UN dan Forum yang bertajuk *Children for a Better Digital World* di Putrajaya.

YB Dato' Sri Rohani berkata, "Penumpuan terhadap teknologi dan aplikasi-aplikasi dalam alaf media bahan menjadi cabaran untuk prosedur kawal selia kandungan terdahulu. Internet adalah sebuah sistem yang mempunyai pelbagai maklumat dari setiap penjuru dunia. Namun, ia telah dieksploitasi oleh pihak yang tidak bertanggungjawab untuk melakukan aktiviti jenayah. Bimbingan dan pemantauan daripada keluarga, penjaga, guru dan masyarakat adalah amat penting bagi membanteras gejala ini. Oleh itu, semua pihak harus bekerjasama untuk menangani masalah ini."

Menurut kenyataan Wivina Belmonte, wakil UNICEF, "*Convention on the Rights of the Child* (CRC) menjaga hak kanak-kanak untuk menerima maklumat yang sah dan menyertai laman sesawang yang sahih. Pada masa kini, Generasi Z terdiri daripada 2 bilion kanak-kanak di seluruh dunia. Generasi ini yang dikenali sebagai *digital native* akan menjadi penentu masa depan.

Pengerusi MCMC, YBhg Dato' Sri Dr Halim Shafie berkata, "Internet berpotensi untuk memberikan impak yang positif. Namun, kita perlu berwaspada dengan risiko yang akan berlaku terutamanya bagi kanak-kanak. MCMC telah menganjurkan program "Klik Dengan Bijak" yang bertujuan untuk mendidik dan mewujudkan kesedaran kepada orang umum tentang cara-cara menggunakan internet dengan selamat dan bertanggungjawab.

Antara tajuk yang akan dibincangkan pada konvensyen ini adalah Penerokaan Alam Siber di Rantau dan Global yang akan disampaikan oleh Cik Kate Pawelczyk dari UNICEF New York, Hak Kanak-Kanak pada Era Digital, disampaikan oleh Profesor Madya Dr Amanda Third dari University Western Sydney dan Cara-Cara Menangani Isu-Isu Keselamatan Siber di Malaysia disampaikan oleh Lt. Kolonel (Bersara) Mustaffa Ahmad dari Cyber Security Malaysia.

###

Disediakan oleh : Unit Komunikasi Korporat
Kementerian Pembangunan Wanita, Keluarga dan Masyarakat
No.55, Persiaran Perdana, Presint 4,
Putrajaya.
Tel : 03-83231100
E-mel:info@kpwkm.gov.my
Tarikh : 24 Mac 2015